



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), člana 64 Poslovnika o radu Skupštine Brčko distrikta BiH (Službeni glasnik Brčko distrikta BiH, broj 54/18 – prečišćeni tekst 17/20 i 24/20) i Prijedloga odluke Vlade Brčko distrikta BiH, broj: 02-000126/20, broj akta: 01.11-1161DS-008/20 od 8. 7. 2020. godine, Skupština Brčko distrikta BiH na I. nastavku 66. redovne sjednice održanom 3. augusta 2020. godine, donosi

O D L U K U

O IZMJENAMA I DOPUNAMA ODLUKE O OSNIVANJU JAVNE ZDRAVSTVENE USTANOVE „ZDRAVSTVENI CENTAR BRČKO” BRČKO DISTRIKT BOSNE I HERCEGOVINE

Član 1

U članu 23 Odluke o osnivanju Javne zdravstvene ustanove „Zdravstveni centar Brčko” Brčko distrikta Bosne i Hercegovine (Službeni glasnik Brčko distrikta Bosne i Hercegovine, brojevi: 27/12, 11/13 i 34/18) stav 8 se mijenja i glasi:

„(8) Osnivač razrješava članove Upravnog odbora prije isteka perioda na koji su imenovani:

- a) na zahtjev člana;
- b) ukoliko član više ne ispunjava uslove za članstvo;
- c) ukoliko član ne izvršava svoje obaveze i dužnosti u skladu sa Zakonom, ovom odlukom, statutom Zdravstvenog centra i drugim važećim propisima;
- d) ako godišnji program rada Zdravstvenog centra nije upućen u proceduru u skladu sa zakonom,
- e) ako Vlada ne usvoji izvještaj o poslovanju Zdravstvenog centra.”

U istom članu iza stava 9 dodaje se novi stav 10 koji glasi:

„(10) U slučaju prestanka članstva u Upravnom odboru jednog od članova, mandat novoizabranog člana Upravnog odbora traje do isteka mandata svih ostalih članova Upravnog odbora.”

Član 2

U članu 24 stavu 1 iza dosadašnje tačke k) dodaje se nova tačka l) koja glasi:

„l) najmanje dva puta godišnje izvještava osnivača o svom radu;“.

Dosadašnje tačke l), m), n), i o) postaju tačke m), n), o), i p).

U istom članu iza stava 1 dodaju se novi stavovi 2, 3 i 4 koji glase:

„(2) Godišnji program rada Zdravstvenog centra, za iduću kalendarsku godinu, Upravni odbor mora uputiti Vladi, radi dobijanja saglasnosti, najkasnije do kraja tekuće kalendarske godine.

(3) Izmjene i dopune akata Zdravstvenog centra, koje je osnivač donio ili na koje je prethodno dao saglasnost, mogu se izvršiti samo uz prethodnu saglasnost osnivača.

(4) Svi pravilnici javne zdravstvene ustanove, kao i njihove izmjene i dopune, kojima se regulišu: plate, naknade, topli obrok, dnevnice i druga primanja, donose se uz saglasnost osnivača.“

Član 3

U članu 25 iza stava 3 dodaje se novi stav 4 koji glasi:

„(4) Naknada iz stava 3 ovoga člana utvrđuje se do iznosa jedne prosječne neto plate isplaćene u Distriktu, za prethodnu godinu.“

Član 4

U članu 31 stavu 4 brišu se riječi: „naknadi za rad“.

U istom članu iza stava 4 dodaju se novi stavovi 5 i 6 koji glase:

„(5) Mjesečna naknada za rad članovima Nadzornog odbora Zdravstvenog centra može iznositi najviše do 70% jedne prosječne neto plate isplaćene u Distriktu, za prethodnu godinu.

(6) Nadzorni odbor Zdravstvenog centra, najmanje dva puta godišnje, izvještava Skupštinu o svom radu.“

Dosadašnji stavovi 5 i 6 postaju stavovi 7 i 8.

Član 5

Ova odluka stupa na snagu danom donošenja i objavit će se u Službenom glasniku Brčko distrikta BiH.

Broj: 01-02-995/20

Brčko, 3. 8. 2020. godine

PREDSJEDNIK
SKUPŠTINE BRČKO DISTRIKTA BiH
Esed Kadrić

Dostavljeno:

1. Predsjedniku
2. Dopredsjedniku
3. Gradonačelniku
4. Odjeljenju za zdravstvo i ostale usluge
5. JZU „Zdravstveni centar Brčko“
6. Sektoru za opće poslove i strateško planiranje
7. Arhivi